



Eilandsraad Bonaire

Datum ontvangst:

AUG 18 2026

Volgnummer:

Z/26/041857-D142059

Na: Kolegio Ehekutivo di Entidat Públiko Bonaire.

Kaya Grandi 30

Kralendijk

Boneiru, Karibe Hulandes

Atenshon: Diputado enkargá ku Finansas, Señora. J.J. Mohamedjoenoes

Fecha: 17 di ougùstùs 2026

Tópiko: Preguntanan por eskrito segun artikulo 45 di Reglamento di Ordu pidiendo kontestanan por eskrito tokante un suma di aproksimadamente \$64 mion akordá pa trabounan di mantenshon di kamindanan públiko.

Apresiable sra. Mohamedjoenoes,

Frakshon di Union Patriótiko Boneriano (UPB) pa medio di esaki ta pidi Kolegio Ehekutivo, en partikular na e diputado enkargá ku Finansas, pa duna klaridat tokante posibel finansiamentu di aproksimadamente \$64 mion pa Boneiru pa trabounan di mantenshon i asfaltamentu di infrastruktura di nos kareteranan publiko.

Motibu pa e preguntanan aki ta debi na deklarashonnan hasi públikamente for di e frakshon di un eks-diputado. E deklarashonnan aki ta duna impreshon ku e eks-diputado, durante un biahe di trabou na Hulanda na yüni 2026, personalmente i pa medio di su negosashonnan, a logra optené \$64 mion pa finansiamentu pa Boneiru serka di Hulanda. Frakshon di UPB ta konsiderá importante pa duna Konseho Insular i pueblo Boneriano informashon tokante esaki i ta pidi Kolegio Ehekutivo, konforme art. 45 di nos Reglamento di Ordu, kontesta por eskritu denter di 30 dia riba e siguiente preguntanan:

1. Kolegio Ehekutivo por konfirmá si en bèrdat tin un suma di aproksimadamente \$64 mion aprobá pa Boneiru usa pa trabounan di mantenshon i asfaltamentu di infrastruktura di nos kareteranan publiko ku un eks-diputado a lòbi i logra komprometé durante di su bishita di trabou na Hulanda den luna di yüni último?

- Si e kontesta ta si, Kolegio Ehekutivo por informá riba kua fecha a risibí e asina yamá "beschikking" pa e fondonan aki?;
- Por duna informashon di e kantidat di e suma?;



- Por indiká di kua instansia e finansiamentu ta bin?
- Frakshon di UPB ta pidi pa Konseho Insular risibí kopia di e dokumentonan ofisial relevante, manera desishonnan i “toezeggingsbrieven” ku ta mustra e fecha i e suma eksakto di e finansiamentu.

2. Kolegio Ehekutivo por duna un deskripshon aproksimadamente di e \$64 mion ku tin pa e trabounan pa drecha kaminda i uso di asfalt, indikando spesífikamente kua parti ta konsistí di:

- medio propio di OLB;
- kontribushonnan di e Reino Hulandes i/of diferente BU;
- medio di SPUK;
- otro fuentenan di finansiamentu; i
- medionan ku na momento di e biahe di trabou na yüni 2026 ainda no tabata asigná?

3. Basá riba e administrashon finansiero ofisial di OLB, Kolegio Ehekutivo por konfirmá òf desmentí ku e \$64 mion ku públikamente ta laga aparentá di ta esfuersonan di e eks-diputado, parsialmente òf gran parti ta trata di medionan ku ya kaba a pasa proseso di petishon, tabata disponibel òf reservá komo medionan propio di OLB for di promé ku e biahe di trabou na yüni 2026?

Frakshon di UPB ta enfatisá ku e preguntanan aki no ta trata di interpretashon polítiko, nan ta mas bien pa por determiná ku echo for di unda e \$64 mion a originá, ki dia a haña e “toezegging” i kua ta e situashon real di e medio finansiero risibí.

En bista ku un kolega miembro di Konseho Insular públikamente ta duna krédito na trabounan di lòbimentu na Hulanda di e èks-diputado pa a logra haña \$64 mion, frakshon di UPB ta konsiderá importante pa laga kontrolá e informashon basá riba e administrashon finansiero ofisial, e dokumentonan relevante i e korespondensia ku ta sirbi komo fundamento pa e finansiamentu.

Atentamente,

Benito R. Dirksz
Lider di Frakshon Union Patriotiko Boneriano (UPB)
Konseho Insular di Boneiru